

四庫全書

史部

欽定四庫全書

史部

張襄壯奏疏卷一

詳校官國子監司業臣納麟實
編修臣裴謙覆勘

總校官編修臣倉聖脉

校對官中書臣李紇

賜錄監生臣張恒

欽定四庫全書

史部六

張襄壯奏疏

詔令奏議類二奏議之屬

提要

臣等謹案張襄壯奏疏六卷

國朝張勇撰。勇字飛熊，上元人。積軍功官至靖逆侯。靖逆將軍提督甘肅軍務。加少傅兼太子太師。是集為其子雲翼所編。始於順治六年，謝寶授甘肅總兵官疏。終於康熙二十三年。

年甘州遺疏凡百二十篇勇初任甘肅總兵
官時即內值肅州回民作亂外值昂漢夷人
窺邊日事攻討中間奉調南征旋回甘肅復
值王輔臣之亂往來征剿日無寧晷其沒也
猶以防禦麥力幹之故力疾出師卒於軍營
計始終兵間四十餘年王進寶趙良棟等皆
由其偏裨起為名將自康熙十三年以後箭
創病足以肩輿督師者十年屢乞解職皆荷

優詔慰留卧理益

兩朝受知之深諸將無逾於勇者今觀集中諸疏大抵皆兵間所作並剴切詳明言無不盡讀之可見

開國之初底定秦隴之方畧並可見

列聖知人善任風雲際會極千載一時之盛焉乾隆

四十五年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

張襄壯奏疏卷一

甘肅提督靖逆侯張勇撰

鎮守甘肅等處地方總兵官都督僉事臣張勇謹

奏為恭謝

天恩事順治六年十一月十二日臣在肅州征勦回逆

行間接閱邸報蒙兵部題覆陝督孟喬芳會題為巖疆亟需總鎮等事奉

旨張勇著以都督僉事充總兵官鎮守陝西甘肅等處
地方勑印即與頒給欽此隨蒙禮部頒給順字第十八
五號鎮守甘肅總兵官銀印一顆又兵部給發甘肅總
兵官劄付一道各到臣該臣即恭設香案望

闕叩頭謝

恩祇領訖伏念臣以介胄武夫遭逢

聖世猥蒙不棄謭劣俾得効命疆場用圖尺寸仰答

高深顧戡定亂畧冒險衝鋒計出萬死一生莫非臣之

職分乃荷

皇上格外優擢實除今職自是權益重而臣之憂益殷
恩愈深而臣之感愈切當茲拜

命惶悚難安祇懼隕越有辜

帝簡然臣自任軍旅以來即矢致身之義况今特膺
寵畀自當更竭報私寒霜卧甲敢懷楊柳之詩夜月橫
戈豈有玉闕之望惟期努力報我

聖朝為此理合具疏奏

謝伏乞

皇上睿鑒施行順治六年十二月十三日奏奉

旨知道了該部知道

附陝西總督孟喬芳原題疏

題為嚴疆亟需總鎮煩請

題補實銜以振軍威以重彈壓事准巡撫甘肅右副都御史周文闕咨前事內稱甘肅遠在邊徼番彝比隣又前叛狃作亂地方殘破今甘涼等處雖已恢復而肅城

賊孽猶盤踞未下况貴部院因延寧告警分兵東向而
攻圍之事毫難疎懈竊慮此時此地非有實銜總鎮則
法令行威恐無以憚將士之心資彈壓之重也其署鎮
張勇功績甚多自任事以來召募壯健以練營伍製造
器械以壯軍實屢戰屢捷斬馘梟逆且其馭兵恤衆咸
得厥心防邊固圉動合機宜誠今日五郡之干城也若
但以署事任之而坐待後來之實授恐無以厭人望而
貽悞于封疆等因移咨到臣該臣看得甘肅一鎮孤懸

河西兼與哈密為隣番彝雜處夙稱極邊要地也且自
闖賊蹂躪之後又值逆狗叛變士馬消耗人民死徙凋
殘之狀大有不堪全賴撫鎮二臣從新整理極力招徠
庶幾望有起色今撫臣周文闕老成持重已稱得人惟
是總鎮缺員雖准部咨委用張勇然係署事之官人心
未免玩視且肅城廻孽尚在盤踞又值延寧告警臣不
得不分兵兼顧雖留有臣標中軍馬寧等兵四千弁續
調臨鎮之兵赴彼協力圍勦務期蕩滅但彈壓兵民撫

禦番彝非得實授總兵未足以憚服其心也况張勇有
謀能戰屢建奇績且自署事以來破賊復城練兵飭伍
製造器甲壁壘為之一新又恤民撫番無不愛戴是以
撫臣有移請實授之議良以封疆起見實非阿私所好
也查張勇履歷功次臣先已造冊咨送樞部訖臣謹會
同撫臣周文闕按臣石維崑合詞具

題伏乞

皇上睿鑒

勅部察議如果臣等所言不謬將張勇准即實授甘肅
總兵仍速

頒賜

勅印則巖疆幸甚臣等幸甚謹題請

旨順治六年五月初四日題奉

旨張勇著以都督僉事充總兵官鎮守甘肅等處地方
勅印即與頒給

鎮守甘肅等處地方總兵官都督僉事臣張勇謹

題為飛報生擒逆首恢復肅州併陳善後事宜事竊河西自狃逆倡亂以來人心惶惑所在城堡類皆淪陷致厯

廟堂西顧已逾年矣凡受封疆之寄者孰不思滅此而後朝食以期母負責成至意先是督臣孟喬芳提臣傅李蟾奉

命調遣滿漢官兵追殺米丁二逆於鞏昌城下大破之米刺印時即授首獨丁國棟猶奔踞肅州為負嵎之計

節經塘報在案續督提二臣平涼定甘之後親抵肅州嘉峪關等處正在分佈營壘指授方畧寇期進勦間適大同姜逆叛變督臣同提臣遂統師赴晉唯留督標中軍副將馬寧帶領馬步官兵四千員名駐劄肅地與

計議攻圍於六年十一月初五日臣方整旅進攻肅城

而洪水報警海彝出口勢甚猖獗兼准甘肅撫臣周文

關手本催兵孔亟

臣受

國厚恩何敢顧此失彼隨撤兵而東親自臨陣以鼓士

氣仰仗

天威遠播海彝望風逃遁唯逆猶未滅猶煩

宵旰

臣

罪莫逭伏思徇氣一日未靖肅州一日未復肅

州一日未復

臣

心一日未安夙夜焦思不得不復謀大

舉併力合圍庶幾肅城指日可下正與撫

臣

周文

闕

商

榷進兵間于十一月二十日據

臣

標中軍署中營遊擊

孫加印報稱本月十八日三更時候卑職遵令領兵首

先登梯從東北角爬城詎賊死守矢石齊發被我兵鑿

戰登陴當晚尅獲東北二城餘賊猶踞守西南城樓等情又據署肅州副將齊陞報據金塔寺守備馮得名塘報蒙古昂漢部落不下數萬絡繹入境口稱往西朝藏蹤跡詭秘等情又接副將馬寧手劄內云金塔寺海彝來有萬餘駝馬極多口稱要去朝藏希速統兵前來堵截等語各到臣該臣細思狃情夙稱叵測况肅圖日久能保其不與海彝交通結成表裏連合之勢今節據前報等緣由唯有先發制人之一策當即飛移督撫按臣

知會臣隨星夜帶兵馳赴肅州於二十七日率領標下

副叅遊都守趙守義等官兵三千員名兼程飛馳到營

一面令臣標遊擊張三耀領兵五百名截斷蒙古昂漢

來路一面令副將馬寧調度各營官兵內外夾攻逆狹

雖高砌牆垣堅守西南被我兵奮不顧身蜂擁爭先勢

莫敢擣當將狹首丁國棟活擒下城時賊方在危急之

際擣命拒戰而我兵銳氣所向無前于二十九日已時

又活擒狹首黑成印併前所獲共二逆俱交副將馬寧

押解督臣孟喬芳處審驗

獻俘請

旨發落此一役也纏漢狗首悉已伏誅僅存殘孽

臣復

率兵四面搜勦當陣查斬逆賊首級十顆仍交馬寧藁

竿懸示計此兩陣共斬狗級五千有奇其餘免脫鼠竄

零星殺死者無算但城池雖復民心尚在驚惶撫綏勞

來不可無人隨即移會撫臣周文閩併檄副將馬寧將

署肅州副將齊陞署兵備道賈還真署監屯廳曹維翰

佈置城內以集逃亡從此肅州之民有官以撫之矣尤

慮地方甫定彈壓需兵除督臣孟喬芳原留駐肅馬步

官兵五百員名外再于臣標下撥兵六百名暫駐肅州

併嘉峪關兩處策應以杜昂漢彝人窺伺之端俟大定

後聽臣調回歸標從此肅州之險有兵以守之矣更查

肅州連歲用兵倉箱如洗目今兵馬所需糧料現在仰

屋臣仍會同撫臣周文閑道臣賈還真動支額銀於附

近產糧處所糴買麥豆以佐軍需從此肅城之兵有糧

以資之矣更昂漢諸彝亦被我兵逐出金塔寺三百餘里外斬首二名獲馬三匹從此衝要之區亦漸次底定矣是皆仰仗我

皇上威福之所致也臣謹臚陳破賊情形及善後事宜以仰慰

聖懷所有行間有功人員并陣傷輕重官兵馬匹等項據副將馬寧冊報轉移該撫臣查報外緣係恢復地方

理合題

報伏乞

皇上睿鑒

勅部察議施行謹題請

旨順治七年正月二十二日題奉

旨兵部知道

鎮守甘肅等處地方總兵官都督僉事

臣張勇謹

奏為欽奉

勅諭恭謝

天恩事順治七年五月二十六日臣差官雷尚雨從

京齋到

勅諭一道欽此欽遵該臣率領官屬匍匐出郊恭迎入署虔設香案望

闕叩頭俯伏捧讀

勅書所載

煌煌天語炳若日星

赫赫龍章光同琬琰綏疆方畧得

廟算而無遺專閫事權賴

王言而益重凜

九重之謨訓動自合宜遵

一代之典章事無過舉臣以駕駘下乘深荷鞭策之加

但恐樗櫟散材莫勝棟樑之任既幸邀乎

異數自圖報於將來不敢稍逸稍安上干

國憲唯知矢忠矢慎仰答

天恩總期無負

朝廷簡拔之榮庶幾少盡臣子捐糜之念者矣緣係欽奉

勅諭事理臣謹繕疏奏

謝伏乞

皇上睿鑒施行順治七年六月初四日奏奉

旨知道了該部知道

鎮守甘肅等處地方總兵官都督僉事臣張勇謹

奏為敬竭愚忠懇調繁劇上報

國恩下盡

臣職事竊

臣

聞推心置腹者帝王待下之誠

竭力殫忠者臣子事君之義昔終軍甫弱冠即欲請纓

繫南越王致闕下馬援耄年猶據鞍顧盼以示可用

臣雖

一介武夫然治兵之暇每流覽古人壯志奇蹟則又未

嘗不贊歎而欣慕之也念

臣

自歷行間荷蒙

皇上拔於儔類之中破格任用時即感泣

聖恩知有

國而不知有家知有

君而不知有身此念久已自矢矣嗣於順治五年間河西逆獨倡亂滋擾地方臣隨師征勦不避矢石仰仗天威遠播羣凶授首所有失陷城池節次恢復蒙

皇上鑒臣微勞加陞總兵官鎮守甘肅自維効命疆場於茲七載雖功不掩過而報

主之誠心固未嘗一日忘也况臣叨受

國恩不為不深上而祖父槩膺

榮褒下而子孫均叨世襲如此

寵眷即頂踵俱捐亦難報稱乃猶尸位素餐偷安歲月縱

天朝寬大之典或可優容而臣自返於心不能無愧按甘肅地處極邊夙稱衝險固用武之區也今則遠人歸服土宇廓清民處其間安生樂業養而教之可以坐觀化理矣獨南氛未靖小醜尚在跳梁臣閭邸抄勦撫俱未就緒致廑

聖懷每一念及未嘗不南向脫裂誓不與賊俱生也夫

叛逆未滅正武臣爭先効命之時今臣坐鎮河西幸值
清晏與其以久逸之身虛糜好爵孰若代久勞之將奮
志前驅且臣年方壯兼有隨帶親丁自備馬匹足資臂
指若不及此時為

國効力日復一日

君恩未報兩鬢如霜欲求如壯歲之摧鋒陷陣斬將搴
旗又何可得哉籲乞

皇上俯鑒愚忠

允臣

陞見

廷授方畧統師前進滅寇安民庶幾少報

國恩於萬一也至臣衛註西安妻子或仍住陝西或搬

移至

京統祈

皇上睿鑒勅部議覆施行順治十二年二月二十五日

奏奉

旨張勇久歷巖疆勞績茂著今奏請効力繁劇忠勤可嘉著即來京以俟簡用

附山陝總督金礪題疏

題為鎮臣奉

旨需用重地關係匪輕謹據實

上請仰祈

睿鑒事

臣

于本年八月二十一日准兵部咨為敬竭愚

忠懇調繁劇上報

國恩下盡臣職事該本部覆甘肅總兵官張勇奏前事等因奉

旨張勇久歷巖疆勞績茂著今奏請効力繁劇忠勤可嘉著即來京以俟簡用欽此備移到臣隨經轉行遵照去後但念甘肅一鎮孤懸河西外環蒙古內雜番族薰之哈密纏頭等彝逼處西偏撫綏駕馭全賴賢能鎮臣威望優崇方資彈壓且自順治五年米丁二逆叛變之後所在殘廢張勇多方整理漸有起色况黃台吉部落

不時遊走內地從而設廠互市飭備脩防無非張勇之
經畫況能破格養人自備甲馬番族蒙古從無侵擾之
患見今商賈通行民安畝畝所謂邊壤之長城一方之
保障也今乃自

請効力繁劇是出忠

君愛

國之心遂荷我

皇上俞旨召用蓋亦嘉其誠悃不以長材屈于短馭也

然張勇赴

京必須另推一將來任邊疆顧甘肅重地番部雜處易動難安新來鎮員恐未必即能奏效一旦易人易地何如輕車熟路之為便也况甘肅南方皆為

朝廷封疆與其另推更換不若仍留張勇鎮守斯土庶于地方有賴邊防永固耳臣有封疆之責良以重地所關不敢不據實

上請伏乞

睿鑒施行謹題請

旨順治十二年九月十五日題奉

旨張勇赴京朝見已有旨了金礪不必議留兵部知道
鎮守甘肅等處地方總兵官都督僉事臣張勇謹

題為欽奉

上傳事順治十二年二月二十六日蒙兵部劄付內開
准吏部咨稱順治十二年正月十九日捧接

上諭諭吏部朕撫育萬方夙夜祇慎講求愛民之道不

嘗三令五申乃年來水旱相尋干戈未靖民窮莫拯兵食不充上德弗宣下情壅塞所以致此弊非一端朕已廣開言路博詢化理復念天下至大民情土俗所在不同地方各官身親實歷凡兵民疾苦政事利弊必皆灼知於心耳聞目見最為真切今文官自督撫以下知府以上武官自提督總兵以下副將以上管轄之內職掌事理向來積弊何以得清見今整頓如何而可俱著詳切直陳無隱以資採用司道知府副將各陳奏一次知

其病即備其藥言其害即舉其利無得浮泛雷同苟且
塞責負朕周諮勤民至意爾部即傳諭行特諭欽此捧
接到部備劄到臣該臣竊聞之主治者君也佐治者臣
也君臣一德則政簡刑清化行俗美天時不能災人事
不能害又何水旱干戈之足以累至治哉粵稽古帝王
之世治稱上理乃堯有九年之水湯有七年之旱舜亦
有苗民之梗化此豈古帝王之治有未純耶抑亦天時
人事之莫可如何在人君唯有與諸臣益務脩德而已

迨其後元圭錫而水土平矣桑林禱而甘霖沛矣干羽舞於兩階而苗民嚮化矣可見天時人事之變終無損於君德也

臣今恭繹

綸音仰見我

皇上敬

天勤民之意其所以廣開言路博詢化理者無非欲大小臣工恪供厥職念切廄疎使水旱潛消干戈偃息以共成樂利之風此即古帝王之心也

臣以庸劣謬任邊

鎮唯隕越之是懼何能仰贊乎

高深然向來之積弊與見今之整頓皆臣所見所行者

敢不一一為我

皇上陳之夫甘鎮去

京師萬里東距西寧為海藏門戶西距肅州為哈密咽喉部落衆多四面環遼營路城堡中處一線往往窺伺搶掠匪朝伊夕今幸

聖化覃敷番彝傾服內外一家可謂超軼前代矣乃前

此之兵民猶交困者何也弊在甘肅總兵官尅減軍餉
耳查甘肅曩日馬戰兵一名月止支銀一兩四五錢步
戰兵一名月止支銀八九錢守兵一名月止支銀六七
錢其餘餉銀盡被鎮將扣尅甚至數月不給兵皆饑寒
逼身且私佔空糧按月虛冒上下禮節坐派營官更有
官庄田地勒令兵丁耕種收成之日子粒盡歸鎮將而
耕田之兵不與焉兵安得而不困也弊又在甘肅總兵
官尅剥小民耳夫民之生計所以贍家口也今鎮將所

需之油鹽酒菓米蔬柴炭之類悉取給于衛官衛官則派及行戶上下輪流供應不絕以貧民有限之膏脂飽鎮將無窮之需索民安得而不困也然其弊之所積更有不堪言者矣從來兵心不齊恃有法以治之今鎮將唯利是圖又安有所謂法者以鈐束營兵哉查甘肅昔時有一人當兵而父子兄弟併親戚交遊輩悉冒在營名色霸佔行市或遇鄉民載賣柴草糧食等物輒三五成羣出城一二十里或三四十里勒令短價賤買貴賣

致百姓不敢進城貿易而生路幾絕母怪乎兵化為賊
民盡為盜所以順治二三年間屢經譟變釀成狃亂
者職此之故也所謂向來之積弊者如此臣自順治五

年銜

命來甘彼時殘黎兵燹城郭丘墟白骨盈郊傷心慘目
臣仰體

皇上以天下為家之心甫至其地即以農業為先務也
乃買備牛種勸其及時耕作繼則以行旅宜通也見有

市廛焚燬客商露宿者即行捐助脩理店舍量給資本
令其招商營生且以凍餒之宜恤也每於青黃不接之
際隨力賑濟以稍甦窮民之困苦者至於城垣傾圮則
催夫脩葺凡一切支放軍餉屯糧官庄及營伍雜費併
從前陋規如日用油鹽蔬炭等項微有損于軍民者盡
行革除迄今七載兵民頗相安矣所謂見今之整頓者
如此若夫訓誡將弁約束健丁整飭邊防警服番彝此
臣職分宜然何敢冒干

天聽唯願軍前諸王侯同經畧諸臣運籌制勝立掃逆
氛出斯民於水火之中將見水火既出兵無征戰之苦
民鮮轉輸之勞人事協而天時和又何水旱之不潛消
干戈之不偃息猶致煩

宵旰之憂也哉緣係直陳地方事宜理合具

題伏乞

皇上睿鑒施行順治十二年三月初三日題奉

旨兵部議奏欽此該臣等看得甘肅鎮臣張勇盡革陋

規多方整頓兵民相安該鎮職掌無容再議奉

旨依議

欽命五省經畧右標提督總兵官臣張勇謹

奏為恭謝

天恩事竊臣謬膺節鉞罔諳韜鈐志雖切乎殫忠功實難以補過每抱慚於衾影恐致負夫

高深迺荷

皇上簡拔之恩久鎮甘肅衝要之地稍弭邊患悉仗

天威茲奉

新綸復調今職敢昧致身之義寧辭竭蹶之勞且得入

叩

闕廷觀

天顏於咫尺因而恭承

謨訓領

廟算以馳驅兼叨

內府殊頒更

允京師賜第

聖恩浩蕩誠千載所難逢臣識迂疎愧一籌之未展但願有生之日皆為圖報之年畢力駕馳實永矢夙夜盡捐頂踵庶少效涓埃者矣臣謹恭設香案望

闕叩頭謝

恩訖理合繕疏奏

聞伏祈

皇上睿鑒施行順治十三年三月二十五日奏奉

旨知道了該部知道

欽命五省經畧右標提督總兵官

臣張勇謹

奏為恭謝

天恩事竊臣以愚鈍庸材荷蒙

皇上不次隆恩陞授湖南右標提督

勅令陞見優加賞賚

恩遇已極及至辭

闕復荷

天語諄諄

指示臣鑄心刻骨感奮曷已今于本年三月二十七日
蒙兵部發給經畧右標提督總兵官劄付一張

王命旗牌八面桿又蒙禮部頒發關防一顆臣即虔設
香案叩頭跪領訖切思謗劣微材濫竽重寄時凜素殮
之懼恒懷尸位之虞惟當勉圖竭蹶仰答

宸恩効力馳驅勵勑

王事雖莫能酬

高厚于萬一庶幾盡涓滴于寸心耳緣係恭謝
天恩事理謹具奏

聞順治十三年四月初一日奏奉

旨知道了該部知道

欽命五省經畧右標提督總兵官臣張勇謹

奏為恭報微臣到任日期叩謝

天恩事臣于順治十二年八月內捧接部劄蒙

皇上陞授湖南經畧右標提督仍令

陛見仰承

天語諄切

賞賚殊常

浩蕩鴻恩捐糜難報

臣辭

關赴秦整頓兵馬于十三年五月二十四日介馬南馳
沿途糧料車船腳力各項齊備各官兵并家口俱于十
三年十一月初十日抵湖南長沙府

臣擇于十一月十

六日在公署恭設香案望

關叩頭謝

恩到任管理經畧右標提督總兵官事務訖仍將所帶
兵馬備造花名文冊呈送經畧輔臣查核聽候奏

聞竊

臣

迂疎謬劣盜負難勝夜寐夙興虛糜是懼惟竭

馳驅之力以矢犬馬之效而已臣曷勝感激惶悚之至

謹具奏

聞順治十三年十一月二十二日奏奉

旨覽卿奏謝知道了該部知道

附經畧洪承疇薦疏

題為特舉卓異武職官員以襄

大典事竊照考選軍政為

朝廷黜陟鉅典關係最重

臣案准部咨

題覆續陳軍政事宜等事一疏內開今武職中豈無廉能智勇超出羣類者請

勑下督撫查照文職卓異事例每省量舉二三人開列實蹟分送查核妥確恭呈

御覽欽遵在案臣今應查照上次軍政事例將臣經畧各標營提督鎮將大小各官親行嚴加察考內有廉能智勇超出羣類堪應卓異官員必應照例據實特舉以光

大典今查有提督總兵官一員謹照文職

大計卓異事例具疏逐一為

皇上陳之

經畧右標提督總兵官張勇事實

一本官奉調湖南招集親丁二千餘名湊備戰馬五千
餘匹製造盔甲器械不惜已資力為報効

一本官于順治十四年十一月內親統官兵晝夜星馳
先赴寶慶之永豐堡地方迎護義王投誠大衆保全
無虞

一本官隨大兵進取貴州親統各鎮各標挑選火器精
兵同滿洲先鋒營前進追賊放塘開山墊路後抵鎮
遠府以東之三十里地方堵截靖州逃賊高文貴等

遠遁隨大兵速進貴州

一本官分駐清平縣撫綏苗民安業又招致偽伯武邦
賢等歸順興隆重安江一帶俱獲安堵

一本官統兵同滿洲大兵攻勦十萬溪險寨親率本標
官兵用命先登以成首功塘報有據

一本官隨

王師進征雲南分同先鋒營前進沿途招出偽將軍林
得勝等衆又于雲南招出偽將軍王玉隆劉之復偽

總兵劉玉田盧朝陽等十數起捐貲安插得所
一本官進雲南後親統官兵搜勦彌勒州阿迷州等處
逃賊招撫州縣軍民土司多有歸誠

一本官先到雲南率兵同滿兵保護賊遺倉糧為數甚
多後經盤量得濟大兵八九箇月支用

考得本官智足籌邊忠圖報

國竭家資而不惜集士馬以從征進貴州則同大兵以
涉險取雲南則隨前鋒以先登故招撫偽營獨多保護

倉糧得濟威名丕著功績超常洵應卓異以表偉伐所
當據實特舉伏乞

皇上勑下該衙門再加查核如果臣所舉不謬聽候請
旨裁定遵行順治十六年十月二十九日題奉

旨該部院知道

欽差雲南臨元廣西提督總兵官臣張勇謹

奏為恭謝

天恩事臣于本年正月十三日准雲南撫臣袁懋功手

本為推陞提督事內開准兵部咨開奉

旨是張勇著以左都督充提督雲南總兵官寫勅與他
欽此備移到臣該臣伏讀之下哭泣失聲竊念臣本庸
材韜畧素昧過蒙

世祖章皇帝破格優擢寸報未展負罪實深今復蒙

皇上特恩宥臣既往之愆授臣全滇重任但臣兩腿先

年俱帶重傷不時痛楚去年四月內又復大發近雖腫
痛漸消猶難乘馬宿疾未痊不無疎曠之虞至於効力

邊疆臣之職也亦臣之願也敢不竭盡犬馬之力自矢捐

糜之念祇期圖報于此生仰答

國恩于萬一耶臣謹恭設香案望

闕叩頭謝

恩訖實不勝感激悚惶之至謹具奏

聞康熙元年正月十五日奏奉

旨覽卿奏謝知道了該部知道

提督雲南總兵官左都督臣張勇謹

題為特請舊員隨往新任查缺補授以固重地事竊臣

前在甘肅時邊疆效命雖少有微績而所賴以左持右

摯者實二三標員贊襄之力居多如臣標署守備今現

任雲南提標管右營遊擊事王進寶者素優膽智夙裕

韜鈴行師則紀律必嚴馭兵以恩威並濟明勳力捐軀

之義擅提綱摯領之長不特才技過人亦且果敢邁衆

誠今日武臣中之翹楚者也又臣原任經畧右標旗鼓

因奉

旨裁缺隨經前任經畧

臣

題補貴州鎮西城守都司僉書強自行者歷練營政諳熟兵機陷陣摧鋒矢石不避亦可稱將弁中之不可多得者矣以上二員向臣見其在西陲實能盡職且備悉屬羌情形邊外地利茲臣欽奉

上諭調遷甘肅保固兩河正在需人非此二員不足以資訓練懇祈

皇恩俯允隨臣仍赴甘肅俟臣到任後查有相當員缺

另疏

題補不獨臣得以再收臂指之用即此二員久從行間始終相信亦未有不歡欣鼓舞均思報效于將來者也臣為人地相宜起見伏乞

皇上睿鑒

勑部議覆施行謹題請

旨康熙二年十一月初四日題奉

旨兵部議奏欽此查王進寶強自行既經該提督疏稱

備悉屬羌情形始終相信應准帶赴甘肅遇有相應員
缺題補其雲南提標右營遊擊貴州鎮西城守都司僉
書各員缺另推奉

旨依議

提督甘肅總兵官左都督臣張勇謹

奏為遵例自陳仰祈

睿鑒事臣本一介武夫恭逢

聖世蒙

世祖章皇帝不次錄用拔臣於稠伍之中數年間授以甘肅重鎮順治十三年内調征雲南

特加右都督充經畧右標提督總兵官順治十六年内進征雲貴復加左都督順治十七年軍政經畧臣洪承疇

題舉卓異在案近奉

新例停止軍政以歷俸三年考滿查臣于順治十八年正月內蒙發到部劄為議設全滇鎮將兵馬等事擬臣

以原銜左都督改充鎮守雲南臨元廣西等處總兵官
覆奉

俞旨劄付前來于本年正月十七日到任康熙元年正
月內奉兵部劄付為推陞提督事奉

旨是張勇著以左都督充提督雲南總兵官寫勅與他
欽此備劄到臣于本年正月二十一日到任十一月
初二日准雲南督臣卞三元咨准兵部咨為邊兵
缺乏軍器等事題覆臣捐銀二千兩零製造軍器紀錄

二次遵奉在案二年九月初九日奉兵部劄付為欽奉
上諭事內開奉

上諭雲南提督張勇前鎮守甘肅地方威名素著屬番
龍言服著以提督現任職銜仍調回甘肅鎮守欽此備劄
到臣驚聞

新命隨具疏恭謝

天恩訖臣自順治十八年正月十七日以左都督任雲
南臨元廣西鎮康熙元年正月二十一日以左都督任

雲南提督扣至康熙二年正月止連閏歷左都督尋

上七箇月相應遵例奉滿具疏自陳伏念臣受

國厚恩慚無寸報自隨征雲貴以來始而鎮守臨元內
輯土司外禦羌寇雖勉殲駕鈍之力巖疆稍獲安寧然
職分所在功不補過我

皇上不加斤譴仍

命提督全滇屢竊

恩榮一籌莫展乃者邊釁廓清南維臣實賴

皇上威福臣有何功久尸厥位復荷

新綸調鎮甘肅但臣幼在行間屢出征勦兩腿帶傷不

時發痛今年四十有六精力日衰夙患愈痼雖凜遵

成命矢圖報效以期無負任使至意然臣自揣羸病誠

恐難任衝邊蓋疎曠之罪雖不輕而封疆之責為更大

臣謹據實自陳伏乞

皇上勑下部臣嚴加考覈別選賢能俾無貽悞于巖疆

且以垂戒于曠職臣無任激切惶悚之至仰祈

睿鑒施行謹具奏

聞康熙三年二月初六日奏奉


旨張勇著復職應得恩典察例具奏者照例賜羊酒表裏綏延
旨復職應得恩典察例具奏者照例賜羊酒表裏綏延
應否加銜加級出自

上裁恭候

命下臣等遵奉施行康熙三年五月二十六日奉

旨張勇先在甘肅時著有勤勞近又以甘肅要地近于

邊外蒙古調補著加太子太保餘休議



張襄壯奏疏卷一

欽定四庫全書

史部

張襄壯奏疏卷二

詳校官國子監司業臣納麟寶

編修臣表謙覆勅

總校官編修臣倉聖脉

校對官中書臣李紇

謄錄監生臣李德

欽定四庫全書

張襄壯奏疏卷二

甘肅提督靖逆侯張勇撰

提督甘肅等處地方總兵官太子太保左都督臣張勇謹

題為欽奉

上諭事准陝西總督咨准兵部咨開奉

上諭雲南提督張勇前鎮守甘肅威名素著屬番讐服

著以提督現任職銜仍調回甘肅鎮守其陝西提督王一正所轄地方應與張勇作何分管爾部議奏特諭欽此備咨到部院准此除分管地方已經具題奉

旨另移外至甘肅提標額設官兵三營作何撥調推補應聽酌用會題等因移咨到臣准此案照臣先奉

簡命調回甘肅鎮守業具有特請舊員隨往新任等事
一疏

請以原任雲南提標右營遊擊王進寶貴州鎮西城守

都司僉書強自行隨帶赴甘查有相當員缺另疏
題補奉有

俞旨欽遵在案今擬以都司僉書強自行補臣標中軍
叅將兼管中營事以遊擊王進寶補臣標左營遊擊至
臣標右營員缺查有原任廣西叅將緣事降二級党從
戎現今赴部候補此一官者昔在臣標効用素悉其為
人年力方壯材技優長懇乞

皇恩准補前缺俾圖後效以蓋前愆至於中營守備擬

以原任提標署守備管右營千總事王光輝補用其
左營守備擬以原任雲南提標署守備管右營千總
事張汝義補用其右營守備擬以隨征部劄署守備
張文星補用再照強自行係都司僉書不應驟補叅
將員缺但查本官原任貴州鎮西城守殺敗賊衆保
全城池戰功最著矧巖邊將領與內地不同倘才智
兼優人地相宜似應破格擢用以示鼓勵者也緣係
推補營員事理臣未敢擅便謹會同督臣白如梅合

詞具

題伏乞

皇上睿鑒勅部議覆施行謹題請

旨康熙三年八月十五日題部覆准補奉

旨依議

提督甘肅等處地方總兵官太子太保左都督臣張勇
謹

題為密陳衝邊情形請增兵馬以固巖疆事竊臣欽奉

上諭調回甘肅鎮守私幸昔任茲土所有邊情地勢曾
為稍悉循例布置似可無事紛更既而又思山川猶昔
人事或非況海彝蹤跡靡常能保無時異勢殊之處隨
即親履沿邊密詢各將弁據云蒙古邇來悉由永昌破
口山丹各處踰越南山竟從內地北出分列各水頭插
帳遊牧等情臣聞不勝駭愕因窮搜博訪始知在在皆
與昔時不同也查昌寧湖離永昌一百六十里舊駐牧
者無多今則男婦老少計有數千矣又洪水山後舊止

有塔素爾害綽庫兒兩家為數不過五六百今則有瀼
卜刀兒并彝衆縱牧于洪水白石崖口一帶亦約有數
千矣又高台洪崖山後討來川等處原係屬番所居竝
無蒙古今則有著述卓目印塔素害的子諸部落紛紛
雜處亦約有數千矣又肅州嘉峪關邊外之赤斤湖與
所屬之金塔寺向無蒙古往來今則哈密海彝時常放
牧亦約有數千矣更查其部落遊散內地駐牧者處處
皆是聞臣兵經過雖暫避出口究竟未還草地巢穴臣

職司提督有統率調度之責際此姦情叵測之時欲為
防微杜漸之計非增添兵數大振軍聲恐不足以資彈
壓也案查部議臣標設兵四千名立中左右前後五營
奉有

依議之

旨欽遵在案但衝要邊防之處非同安閒坐鎮之區設
兵四千臣愚猶以為未足以備緩急之用似應增補一
千名共合五千之數馬戰三千步戰二千分佈五營無

事則時加訓練壯我軍容有事則由近及遠調遣四應
庶疆圉保固無臨時抽調之煩矣然臣更有請者查涼
州一城北則蒙古帳幕環拱而居南則西海部落相連
雜處乃河西緊要甘肅咽喉之地也臣已會商督臣擬
將甘肅鎮臣移駐涼州以資控制見在會疏題

請其鎮標營制各兵亦須馬步各半庶可以收臂指之
效除沿邊協路各營斟酌衝緩量行增添分別調撥甚
布星羅固我疆圉容臣詳查妥確會商督臣另疏上

聞外緣係請增兵數事理臣謹會同督臣白如梅合詞具

題伏乞

皇上睿鑒

勅部議覆施行康熙三年十一月二十四日題

奉

旨兵部速議具奏欽此該臣查得甘肅地處衝邊提督有統率調度之責應如所請再添兵一千名應于所裁

督標二千兵內撥補一千以實營伍至所請馬戰三十
太多馬步相應各准二千五百名其涼州據稱河西繫
要甘肅咽喉之地准以馬步各半可也奉

旨甘肅嚴疆著照提督所請准馬兵三千步兵二千餘
依議

提督甘肅等處地方總兵官太子太保左都督臣張勇

謹

題為備陳防禦機宜以作未雨綢繆之計事竊照河西

乃三秦重地自莊涼歷甘肅以至嘉峪北倚長邊南隣山谷中通一線計一千五百餘里番彝交雜帷幕聯絡情形叵測守禦需兵兵力之重輕關係疆圉之虛實臣謹按要害之處酌量增兵請一一為我

皇上陳之查肅州副將營地處極陘當河西上游三面番彝險要第一原設兵一千名不足以資彈壓應議增兵四百名嘉峪關守備營密邇赤斤湖地方海彝駐牧衝隘要地原設守兵三百名不足以守險要應議增馬

兵一百名金塔寺守備營處在邊外孤懸彝帳之中原
設兵二百七十名不足以備捍禦應議添兵一百三十
名下古城守備堡所管深哨東壩為彝騎出沒要路原
設兵一百四十名分布不足應增兵六十名清水守備
堡附近黑番宛卜又接討來川彝數原設兵一百一十
名哨守維艱應議增兵九十名鎮彝遊擊營逼近狼心
山兀魯乃亦集乃湖極衝要地原設兵四百名防禦難
周應議增兵一百名甘州東去涼西至肅各五百餘里

瞻顧左右最為重地南山之內北邊之外彝騎羅列挿帳遊牧臣駐甘城有兼顧三鎮策應調度往來之任非同守汎者比甘州制設城守守備額兵二百名分布最難萬一臣提兵出境則城守關係重大應議改設叅將增兵六百名以甘屬之高臺洪水黑城山丹營路歸城守叅將兼轄以專責成涼州為河西重地逼臨黑溝龍灘等口天池白水諸隘移駐鎮臣于此應議設馬步戰兵各半以壯西陲保障西寧當番彝門戶市口通衢商

賈貿易窺伺之心易起固守之機宜先鎮標營制亦須
議改馬步戰兵各半以壯聲援洪水遊擊營當南山扁
都口西水關永溝虎刺各要隘尤甘南第一衝險今制
兵七百五十名不足以資防禦應議增兵二百五十名
并增中軍守備千把各官黑城遊擊營汎屬後所白石
崖等處當南山要隘原設兵四百名不足以備堵禦應
議增兵一百名山丹遊擊營乃甘肅通衢衝要重地原
設兵四百名防範難周應議增兵二百名破口守備堡

峻嶺重關為甘肅咽喉原設兵一百四十名應議增兵一百六十名平川守備堡北近長邊後通海套原額兵一百名應議增兵一百名炭山把總堡所管橫梁山西打班逼近海套原設兵三十名應議增兵七十名永昌參將營乃甘涼通衢汎地廣闊接海近牧番族交錯極稱衝險原設兵七百名難敷四應應議增兵二百名水泉守備堡附近大黃山三岔嚮門等口衝險數十處原設兵一百四十名應議增兵一百六十名寧遠守備堡

孤懸境外接連昌寧湖密邇大海子原設兵一百四十
名應議增兵一百六十名土門守備堡切近鵝頭山黃
花兒灘原設兵一百四十名應議增兵六十名安遠守
備堡所管可可墩紅溝兒近海要隘原設兵一百四十
名應議增兵六十名黑松把總堡孤立萬山接連倒坡
河青石崖諸處原設兵七十名應議增兵三十名鎮羌
遊擊營處在萬峯交錯番彝環居烽火時警原設兵四
百名戰守不足應議增兵三百名鎮海遊擊營切近西

海彝騎為隣衝要重地原設兵四百名防禦維艱應議增兵二百名岔口守備堡北通海道西連大通河腦原設兵一百一十名應議增兵四十名莊浪叅將營西接甘涼東通蘭州界連西寧險要重地原設兵七百名不足策應應議增兵二百名河州副將營所轄要隘積石等關景右各處北隣番彝原設兵一千名分布難周應議增兵二百名紅水遊擊營建設小松山尾下處在萬峯叢中套彝出沒之地原設兵三百名應議增兵一

百名洮州叅將營逼隣海彝切近生番最號衝險原設
兵五百名不足彈壓應議增兵二百名舊洮守備堡接
連松茂生番環原設兵一百五十名應議增兵五十
名鞏昌遊擊營四路衝繁且有城守藩庫錢糧之責前
駐總兵鎮守今設遊擊額兵五百名防禦不足應議增
兵二百名通計甘肅西寧二鎮屬應議增兵四千五百
二十名但增兵必先籌餉叩懇

睿鑒裁腹裏無事之緩補邊疆衝險之急庶邊圉益固

而腹地永寧矣臣謹密會同總督臣白如梅合詞具題
仰祈

睿鑒勅部議覆施行康熙四年七月十六日題
奉

旨兵部議奏欽此查甘肅西寧雖見設兵二萬九千有
餘但係陝西邊要處所均應如該提督所請增設各兵
應請

勅下該提督于該省腹裏五萬一千有餘兵內酌量作

速撥給造冊報部城守叅將臣部另推其洪水營應設
守千把數目應行該提督確議具題到日再議奉

旨這增兵事恐該提督復奏遲悞依議速行

提督甘肅等處地方總兵官太子太保左都督臣張勇
謹

題為邊氛未靖要地需兵乞速

題請增設以資戰守事康熙五年三月二十日准甘肅
鎮臣孫思克移咨到臣為照甘涼處秦封上游為關隴

右臂乃緊要地也比隣海彝素稱刁悍番族雜處名號
衆多雖自定羌廟戰敗之後業已南徙然秋高馬肥能
保其不有窺伺之端乎况臣所轄三鎮西寧之衝險則
與甘肅較同而寧夏扼制兩河兼與賀蘭密邇且距甘
肅二千餘里相隔懸絕萬一有意外之虞西寧既不可
捨已以援人寧夏又豈能朝呼而夕至夫以甘涼重地
兩路均難分兵所藉以指臂相顧舉動相維者惟臣標
與鎮營各官兵而已如此不議加兵殊非得計但加兵

非難而需餉浩繁臣再四圖維因就各營堡制額數內
權作變通之計緩固足以自守急復可以相資者擬將
臣等會

題備陳防禦機宜等事一疏新增營堡兵內斟酌改撥
一千名歸甘肅鎮標照舊立為五營合原額共四千名
仍復前後營遊守千把各官經制無事則整練軍容遇
警則相機應援實可以顧此兼彼不議增兵而獲增兵
之用查甘肅鎮標額兵業已奉有

諭旨馬步戰兵各半今改撥各營堡率多守兵尚不足
馬三步七之額或應將改撥一千名亦改為馬步戰兵
各半以振軍聲此臣就衝邊不得已之中而權為變通
之策倘蒙

皇恩俯念嚴疆重地照臣所請以山東山西河南江南
等省裁汰兵馬額設糧餉撥補邊地選募精壯如此則
營路守禦既優而鎮標四應之兵聲勢又振聯絡堵禦
俾海彝不敢窺伺強固邊疆規模弘遠矣除將擬撥營

堡新議增兵數目造冊送部外臣謹密會同總督臣白
如梅合詞具

題仰祈

睿鑒勅部議覆施行康熙五年三月二十六日題

奉

旨兵部密速議奏欽此查該提督疏內既稱甘涼所藉
以指臂相顧舉動相維者惟臣標與鎮標官兵等語請
設前後營官兵及改為馬步戰兵各半應如所請但係

錢糧不敷之際不便准從應准于各營堡內暫撥兵一千名歸入鎮標三營管轄俟邊境肅清之日仍裁歸各營可也奉

旨著照該提督所請行

提督甘肅等處地方總兵官太子太保左都督臣張勇謹

題為海彝潛謀不軌密探已確請發大兵用彰

天討永靖邊氛事竊惟兵凶戰危古人蓋不得已而後

用之然與其不用而圖一時之安何如用之而絕後日
之患夫天下之患莫不起於微而遂乃漸積以至於著
迨至于著而方遏之而始謂謀之宜早也亦已後矣臣
待罪甘肅屢奉有

將沿邊地方如意固守之

旨雖奮貞是虞何敢不仰遵

嚴綸悉心籌畫以固疆圉隨于三月內咨明督臣帶兵
馳赴南山沿口一帶親行巡察西自西水關東抵涼屬

之江嶺口除山谷小口不計外查要隘數十處在在衝
險徑路廣濶防守良難今海彝部落雖搬移出口而大
草灘水草肥美東西坦平三百餘里彝人遊牧于此臣
恐其久戀不捨也又查黃城兒在祁連山北本我內地
方圓數百里今彝目麥力幹現住大通河其部落亦各
盤踞于此立局設爐製造軍器開懲屯種日事操練此
其意果欲何為哉臣即密差通丁何成等往番族哨探
聞各彝目糾合部落督造弓箭印烙馬匹演放鳥鎗聲

言入犯一股直入河州臨鞏一股進迫西寧一股分犯甘肅涼州雖傳聞未可深信然狡謀叵測亦已由微而將著矣臣思我

朝定鼎以來威加海內勢如破竹誰復有逆我顏行者獨此厄魯特蒙古叛服不常然按其地雖通連西藏不過荒徼邊塞非有膏腴土田可以積草屯糧也其人馬非甚強壯也其兵甲亦非甚堅利也

天戈所指何難拉朽摧枯乃猶曲意招徠准其開市貿

易且以境內數十萬之番族歷來領種茶馬者舉以與之令其輸納蒙古添巴此無非體上天好生之德與邊境相安于無事也為厄魯特蒙古者應宜感激

皇仁傾心向化今乃不安窯穴蟻聚蜂屯於祁連山上并率各部盈千動萬縱牧于內地之大草灘

欽差蹕勘驅逐竟抗不從甚至如去冬之定羌廟不遵撫諭敢披盜擐甲與我官兵對敵此其心尚可以恩信固結者哉臣愚以為宜及此時迅調大兵出其不意先

發以制之盡行掃蕩將領種茶馬之番族照舊取回作我
藩籬此其機不可失也若待秋高馬壯一旦犯疆邊地
遼闊策應莫及是貽悞封疆臣雖粉身碎骨亦不足以
贖其辜矣但邊外海彝不同于內地寇賊何敢上請
禁旅遠勞跋涉惟陝西駐防大兵或可就近請發併量
調綠旗精銳期以五月底至邊分發進剿誠可必其一
舉而邊患永靖者也况番族被海彝需索無厭怨入骨
髓皆願內附為我效命正可乘其機而用之倘延至數

年之後反被海彝威迫編入隊伍是數十萬番族不特
非我藩籬且作海彝牙爪表裏連合其為患更有不可
勝言者矣緣係密謀大舉事理臣謹會同督臣白如梅
合詞密

題伏乞

皇上睿鑒勅部議覆施行康熙五年四月二十六日

題奉

旨軍務無旨不得妄動但相其動作好生隄防將内地

各處嚴緊防備邊疆地方毋得先自輕動致啓兵端其
番人仍行撫綏體恤以和其心

提督甘肅等處地方總兵官太子太保左都督臣張勇
謹

題為及時脩築以重邊防量撤守兵以固內地事竊照
厄魯特蒙古部落遊牧挿帳雜處於內地等處居民苦
其肆擾商旅愁于道路者已非一日矣自康熙三四年
間或被我兵堵殺于定羌廟或被我兵擒縛於古溝凹

始漸次移徙今亦頗知有

朝廷法度也先是臣於康熙五年三月內會同鎮臣孫思克帶領官兵及甘山道臣袁州佐親赴南山各隘巡

察宣布

皇上德威間當有原任洪水城南彝目淮河力柰台吉率領遊牧大草灘各家部落俱行搬移出口訖臣即同鎮道二臣計議捐輸僱覈匠作及需用等項并行令汎防將備鼓勵官兵自扁都口西水關起至嘉峪關止大

小各隘照依舊址脩築但既絀於費用復又艱于工資
未免草率不可以垂永久者也業將脩築緣由照會甘
山道轉報前督臣在案其扁都口迤東至涼屬安遠可
可口止約計數十餘處則全未脩築彼時因屬在內境
且係番族駐牧地方現有麥力幹等部落戀牧于此今
聞臣統師至莊調度遣發軍聲大振始相率盡行出口
當准鎮臣孫思克咨報及臣差通丁確探均稱西海蒙
古遵奉

本朝勅諭將內地遊牧部落行令搬移歸巢各情節隨
經呈報兵部在案續准西寧鎮臣王可臣咨稱各彝目
拔帳散歸各原住地方住牧等因又准甘肅鎮臣孫思
克咨報蒙古部落盡數搬移出口等由又准鎮臣孫思
克咨稱住牧之蒙古既已悔禍回巢則內地之官兵防
閑應加倍密查甘涼南面逼隣西海向來未設邊牆止
借祁連山為屏藩但自甘州南古城大尾麻龍口至安
遠堡相去不啻千里要口極多請照各營路該管分屬

之汎地酌量分撥聯絡布置首尾策應以嚴堵守可也
等因咨移各到臣該臣查得西海蒙古歷年遊牧內地
滋擾已久近遵

功令盡搬出口而邊境稍獲肅清矣然思今日之肅清
不可不慮及後日之叵測臣節准二鎮臣咨稱前由再
四籌畫唯有照明季舊址脩築邊牆審度形勢大小酌
量安兵勤加守望之為得策也然脩築可口迤西至
白石崖後所口等處及重整扁都口至嘉峪關各隘中

間壘砌牆闡需用磚石鐵柱以及匠作夫役工料等項
約估銀三萬餘兩業經臣行令鎮道地方文武各官會
議脩築去後但查邊隘地寒早凍必須來年五六月間
天氣和煖層冰消解方可興工俟到彼時提鎮隨帶官
兵道臣督率夫匠分頭脩築懸堦固守整立烽墩如是
無事則登高遠哨有事則傳烽接應洵為一勞永逸之
至計矣然臣更有慮者今歲河西涼州各處荒旱米價
騰貴前督臣白如梅於查訪備邊等事具

題奉撥督提延興四標官兵西來協防計四千員名內
地空虛似非居重馭輕之策合無先將督標陝西提標
官兵二千名撤歸原伍以固根本其延綏鎮標官兵一
千名暫留分撥防禦洪黑永昌等處興安鎮標官兵一
千名亦暫留駐防臨洮等處以壯西河聲援俟後酌量
時勢再作計議請

旨定奪顧此脩築撤兵二事一以防外一以固內唯內
外之無虞斯可益措封疆於磐石之安矣臣為未雨綢

繆先時預備起見謹會同督臣盧崇峻合詞具

題伏乞

皇上睿鑒勅部議覆施行康熙六年九月初十日題

奉

旨該部議奏欽此查可口等處壘砌牆闡及需用磚石等項銀兩督標陝西提標官兵撤歸原伍延鎮官兵暫留分防興鎮官兵暫駐臨洮等情由均應請
勅該督會同提督詳議妥確具題奉

旨已有旨了

提督甘肅等處地方總兵官太子太保左都督臣張勇謹

奏為遵

旨自陳事康熙六年六月二十九日蒙兵部劄付內開奉

上諭提督及總兵官俱著自陳欽此備劄到臣蒙此竊
臣待罪甘肅三載於茲矣上既不能殫心竭慮懋著勲

猷以報

朝廷知遇之恩次復不能制勝出奇龍服番獎以清邊
圉窺伺之釁撫心自問負罪良深兼以臣昔年効力行
間為流矢中傷不時腫痛醫藥罔效病勢日篤每藉肩
輿以代步履起居坐卧動須扶持以臣病之困憊如此
舉凡登降拜跪之禮皆不能行倘猶寄以封疆之重不
特無以領袖偏裨亦非所以示威于邊境也况甘肅何
地提督何官而奄奄垂斃之夫可以尸位素餐于其際

者哉茲當

大典激揚之時正值仕路整刷之日臣若不將病篤情由據實自陳是臣自欺以欺

皇上掩飾貪戀之罪擢髮難數矣伏乞

睿鑒俯念衝邊重地病臣委難坐理亟

簡賢能星馳代任

准臣休致則黜陟之典益彰而地方之責有賴矣臣無任惶悚待

命之至為此具本謹具奏

聞康熙六年十月初二日奏奉

旨張勇具有才能擢用提督著照舊留任

提督甘肅等處地方總兵官太子太保左都督臣張勇

謹

奏為恭謝

天恩事蒙兵部劄付為遵

旨自陳事內開議得甘肅提督總兵官張勇任事勤

勞才能昭著仍應留任但自陳提督總兵官去留出自

上裁等因奉

旨張勇具有才能擢用提督著照舊留任欽此欽遵備劄到臣蒙此臣即恭設香案望

闕叩頭謝

恩訖伏念臣猥以庸愚深叨

眷顧韜鈴素昧既無決奇制勝之能疾痛時聞復鮮振

刷蕩平之績三邊守土慚非專閫良才萬里分符謬作長城重寄允宜罷黜以示激揚乃荷

溫綸仍留供職不忍病臣勞瘁置之擯斥之科且念邊地衝繁畀以事權之重感

聖主莫大之德俯

賜優容竭餘生未盡之年徐圖報稱但願河山永奠綿萬年歷數之祥尤冀氛沴全消靖四海兵戈之氣臣雖悉捐頂踵亦無任懼忭矣為此理合具本

奏

謝伏乞

皇上睿鑒施行康熙七年六月初八日奏奉

旨該部知道

提督甘肅等處地方總兵官太子太保左都督加一級

臣張勇謹

奏為微臣發病日深恐悞嚴疆重寄懇乞

聖恩別簡重臣以資彈壓事竊臣以樗櫟散材蒙

世祖章皇帝拔於衆人之中授以節鉞復荷我
皇上待以心腹

寵眷日隆臣敢惜此餘生而不效古人裹屍還葬之義
以少報

國家數十年豢養之恩乎奈臣自昔年受箭傷腿之後
時常痛楚迄今病勢較甚每遇天陰腫發則精神恍惚
坐卧不寧臣思邊陲要地所關最鉅豈宜以殘廢之軀
濫竽名器業已屢疏乞休疊蒙

皇上不即罷黜兼

允假往湯泉療治其所以

加恩于臣者至矣不料臣為瘡毒所傷血氣漸耗於康熙十一年間痰火陡發諸病叢生日坐肩輿以代動履衰殘困憊幾成廢人因伏枕思維以臣之病篤如此而猶肩茲重任將誰欺也乃復於自陳疏內奏

請休致未邀

諭旨夙夜彷徨至今正月初二日夜間舊疾復作昏迷數次較前更劇隨于本月初四日移咨督臣哈占代為題

請問於初十日接准督臣咨為緊急軍情事聞雲南告變飭臣整頓兵馬以備不虞又節蒙兵部劄付欽奉

上諭著臣固守地方臣思逆氛未掃之日正武臣不遑寧處之時何敢因病推卸不自鼓勵致涉規避之

嫌乎但臣撫心自問萬難欺飾以負

皇上付託之重蓋固守地方在尋常無事時不過布置得宜隄防加慎已耳目今全滇既叛正沿邊多事之秋萬一海彝乘機窺伺臣以孱弱病夫豈能扶輿臨陣與賊對壘哉况甘肅為三秦門戶提督乃三鎮綱維雖強幹精明者猶恐不足以資控制衰朽如臣而欲扶病鎮之勢必不能矣我

皇上撫臨萬方懷材抱能可備干城之選者自不乏人

獨是臣叨

兩朝知遇之恩當茲亂臣犯順不能提兵汗馬為國討賊而顧以病辭此則臣之所椎心泣血而不能自己者也伏懇

皇上俯念甘肅重地亟簡精敏才幹重臣交代提督事務庶統馭有人邊疆賴以鞏固矣臣無任惶悚懇切待命之至為此具本謹具奏

聞康熙十三年正月二十日奏奉

旨卿簡任提督久歷戎行勞績茂著嚴疆軍務正資料
理著照舊供職不必以病求罷該部知道

提督甘肅等處地方總兵官太子太保左都督加一級
臣張勇謹

題為察情之臣測堪虞邊地之扼防最亟請速增兵以
固疆圉事案照康熙十一年八月內臣接西寧鎮臣王
可臣手札內稱達賴台吉統領彝目各帶兵馬徑往正
南而去又據臣差去探聽通丁王有才報稱達賴台吉

領兵開路直抵雲南麗江各等情業於康熙十一年十月初十日報明兵部在案續蒙部劄令臣嚴飭沿邊鎮將加意防禦等因臣遵即嚴加固守并行所屬再為偵探用心隄防外經今一載有餘未據有回巢之報目今雲南變亂現奉

上諭飭臣固守地方但臣所屬各營汎地在在兵單際茲藝兵未回逆臣反叛之時臣有封疆之責敢不未雨綢繆預為安邊至計臣思向者蒙古帶兵徑抵雲南今

適在叛逆作亂之地若吳三桂啖以重利令其出沒
分我兵勢則邊外一帶未可保其無事臣在病中籌
畫至再實廢寢食茲謹就各邊衝險之處所宜添兵
固守者一一臚陳之除甘肅所屬隘口繁多臣與鎮
臣極力防禦毋庸議增外查莊浪兩處汎兵寥寥雖
設有撫標官兵然為數無多恐難控制也更查階河
二州界接番彝悉屬衝隘兼以階文路近四川尤為
要口茲階河二營僅設額兵六七百名內馬戰兵不

過各三百名倘遇有警而兵力單薄尤難堵禦也更
查臨洮府迤南則通階州文縣迤西則連西寧河州
亦為四通之處接應需兵合無於臨洮或滿洲勁旅
或綠旗精銳調遣駐防於此萬一所在告警則應援
有兵矣更臨鞏二府皆在山谷之中地勢遼廓守兵
無幾亦深足慮若得於此處增添兵數以壯聲援不
特邊圉鞏固即隴右等處亦可保其無虞也臣為防
禦邊疆起見理合題

請伏乞

皇上睿鑒勅部議覆施行謹題請

旨康熙十三年正月二十日題奉

旨兵部速議具奏欽此查調遣官兵係地方督提專責應

勅下該提督會同督撫將不緊要處所官兵調遣緊要處所固守可也奉

旨依議

提督甘肅等處地方總兵官太子太保左都督加一級
臣張勇謹

題為欽奉

上諭事臣于康熙十三年正月十四日蒙兵部劄付內
開奉

上諭諭總督哈占提督張勇雲南作亂先已有諭固守
地方今叛逆吳三桂倘有偽劄偽言煽惑軍民當曉諭
官兵百姓令其出首具奏爾等皆朕股肱之臣固守地

方安撫軍民皆賴爾等特諭欽此備劄到臣又於本年正月二十日蒙兵部劄付內開奉

上諭諭提督張勇係朕擢用封疆大臣爾當督率所屬鎮將固守地方倘叛逆吳三桂散布偽劄即行舉首如有作亂非為嚴加拏究務副朕股肱倚任至意特諭欽此又備劄到臣該臣節經飭令所屬一體欽遵用心固守地方并嚴行密訪偽劄偽言與作亂非為之人務必緝獲外竊念臣本一介武夫材質駕鈍蒙

世祖章皇帝拔臣於稠伍之中逾格委任不數年而即
膺專閫復荷

皇上念臣乃

先帝舊臣邊疆効命稍有微勞

眷顧屢加不次擢用計歷兩任總兵三任提督授以世
職錫以

誥命俾臣祖父咸受

榮褒妻子悉叨

封侯

本朝武臣受

恩之厚於臣為最臣即釐骨粉身以圖報稱亦未能仰
酬萬一也近吳三桂不守臣節興兵犯順凡有血氣者
靡不切齒臣恨不得生擒叛賊致於

闕下正法寸磔以快人心尚何有偽言偽劄之足以汙
臣之耳惑臣之心哉茲臣兩奉

上諭皆以股肱待臣跪讀再四不覺感泣失聲自念臣

有何功而蒙

皇上推心置腹至於如此祇恐箭瘡時發不堪以衰朽之餘肩茲重任致負

國家三十年豢養之恩是則臣日夜之所深憂者耳至於保固疆圉捕奸緝逆皆臣職分之所當為者若防閑不嚴稍涉疎縱母論

國憲之所不容而臣既負

皇上且負

先帝臣亦何面目生於世間死於地下哉查雲南至秦
相距萬里未可朝發夕至此後倘有逆黨散布書劄簧
鼓人心臣當潛探密偵設法搜捕斷不令此輩匪類得
以漏臣之網也但吳三桂位極人臣不思報効反行背
叛為神人之所共憤

天討之所必加釜底游魂偷生旦暮伏願

皇上勿介

聖懷從古豈有亂臣賊子得保首領者乎臣遠在邊陲

萬里葵忱唯有望

闕廷而瞻戀者矣仰祈

皇上睿鑒施行康熙十三年正月二十三日

奉

旨覽卿奏具見忠誠知道了該部知道

提督甘肅等處地方總兵官太子太保左都督加一級

臣張勇謹

題為叛賊差送逆書特疏舉首事案照臣前奉有

固守地方倘叛逆吳三桂散布偽劄即行舉首如有作亂非為嚴加拏究之

上諭臣即嚴行所屬一體欽遵在案今於康熙十三年二月二十日酉時執得成都府茂州逕州逆差王則孝王友英二名并帶有鈐印路票一張稅票二張又與臣書一封問據來差供稱有話俱在書內臣隨拆閱內有吳之茂名帖則此書係吳逆差送前來以簧鼓兵心無疑矣復細加搜檢又獲出與陝西提臣王輔臣手札一

封臣亦拆看與投臣之書俱是敘問等語但因與提臣
王輔臣書內有來差口稟一語仍嚴加盤詰據供吳之
茂係吳三桂之姪現稱西蜀大將軍此正月二十八日
吳三桂之子已到成都欲將吳之茂家口一齊搬到成
都居住然後統四川兵馬前去湖廣等情據此除將逆
差嚴加鎖鈕著人看守外緣據供有統兵赴楚情由臣
即將書票等件飛咨知會督臣哈占次日隨將逆差王
則孝等二名差官押解督臣處嚴訊去後緣係舉首逆

差投書理合飛疏題報伏乞

皇上睿鑒施行康熙十三年二月二十二日題

奉

旨覽卿奏賊黨吳之茂差人送書即執其來人并逆書
舉首忠貞可嘉著從優議敘已有旨了兵部知道

提督甘肅等處地方總兵官太子太保左都督加一級
臣張勇謹

奏為恭謝

天恩事蒙兵部劄付為微臣廢病等事內開康熙十三年二月十四日奉

旨卿簡任提督久歷戎行勞績茂著巖疆軍務正資料理著照舊供職不必以病求罷該部知道欽此欽遵備劄到臣蒙此臣思漢臣馬援耄年據鞍班超垂老立功異域彼豈不思名成身退哉良由報

國一念矢切捐糜况臣以一介武夫疊荷

皇恩不次拔擢格外信任又何惜此餘生而不為

朝廷效力其所以屢疏乞休者無非以病體日深恐悞
巖疆益滋罪戾耳與樂耽林泉自高恬退有別迺蒙
皇上俯鑒愚忠不以廢病仍著供職非信之深而任之
篤者弗克邀茲

寵眷也臣自分衰朽長為世棄乃蒙

皇上垂憐不惟不加擯斥而仍畀以事權拜讀

溫綸不勝感泣臣若再疏懇辭恐違

成命致負

天恩因勉起任事以酬

曠典倘臣得少延殘喘則未填溝壑之年皆為圖報

高厚之日也為此理合具本奏

謝伏乞

皇上睿鑒施行康熙十三年三月十二日奏
奉

旨該部知道

提督甘肅等處地方總兵官太子太保左都督加一級

臣張勇謹

奏為恭謝

天恩事蒙兵部劄付為叛賊差送逆書等事內開該臣等議得提督張勇出首逆黨吳之茂書劄并執來人解送總督又親行出首具題忠誠昭著應優敘與世職查提督張勇現係三等阿達哈哈番今應加拜他喇布勒哈番授為一等阿達哈哈番先准世襲四次今再加世襲二次俟

命下之日劄行該提督將原領

勅書繳部轉揭

內閣撰給

勅書可也等因奉

旨張勇授為一等阿達哈哈番餘依議欽此備劄到臣
蒙此臣即恭設香案望

闕叩頭謝

恩訖伏思自吳逆背叛以來散布偽言軍民煽惑凡任

封疆之重者倘有緝獲即行

題報此臣子之本分宜然無足為異臣待罪戎行每恨不能尅期勦滅致厓

君父之懷正深惶悚又以曩受箭傷釀成痼疾蒙我

皇上不以衰朽廢棄特加謹斥已出望外何敢僅以舉首逆書一疏濫膺

上賞優獎逾分授以世職被以殊榮人臣遭際於此

為極感泣之下不無抱慚惟有益矢忠貞効命疆場
以少酬

皇上寵遇於萬一耳除將原領

勅書繳部外理合具本奏

謝仰祈

睿鑒施行康熙十三年五月十一日奏奉

旨覽卿奏謝知道了該部知道

提督甘肅等處地方總兵官太子太保左都督加一級

臣張勇謹

題為密報賊勢披猖姦情狡詐請乞補官給餉

勅通道路以資戰守以便恢復事竊照自寧羌變後最先則秦州副將陳善棄城逃走逆賊王輔臣即回據秦州再則鞏昌遊擊袁成樑以城從賊協防階文洮岷參將潘瑞撤兵回營以洮岷從賊階州副將江有倉竟無音信致川賊僞將軍四員僞總兵一員入犯階州繼則臨洮營遊擊守備曾文輝等以臨洮從賊後則輔臣遣

趙陳兩偽鎮竊據鞏昌而蘭州彈丸之地危若累卵是以臣與甘肅鎮臣孫思克西寧鎮臣王進寶各領本標官兵兼程應援甫到中途於二月初五日聞蘭州城守遊擊董正已與撫標守千勾引逆賊裏應外合率兵民盡皆從賊撫臣誓與城相存亡不肯抽回兵馬所有調去甘肅鎮標并各營副參遊守達爾護等見賊勢重大內外夾攻萬難固守恐復蹈經畧故轍哀請過河徐圖後舉其撫標左營遊擊張大選右營遊擊楊三元見守

備與各兵俱有從逆之勢萬難挽回隨護撫臣過河而
臣等即欲前進恢復奈河水融開官兵不能飛渡且准
甘肅鎮臣咨稱海彝入犯搶去紅崖地方牛羊馬匹打
死兵民又准咨報海彝四五百騎與官兵對敵要犯搶
肅州高臺等地方各緣由臣隨駐劄永昌以為策應此
臨葦階秦蘭州失陷之大畧也而其間調遣援禦不敢
贅瀆

宸聰惟是蘭州既失河西之咽喉已為賊有盤踞隴山

長河之外與川賊相連其勢亦甚猖獗矣省城之音信
難通糧餉不前河西亦甚阽危矣况加以海盜乘我內
地有事不時蠢動臣等處此時勢急迫之時若不速謀
保護河西即所以保護關中之良策其何以仰副我
皇上倚任之重乎是以撫臣親至永昌即與面議臣當
駐師莊浪以便進剿但查河西三鎮所屬曾經經畧總
督調去官兵當此在在多事之際應宜選補招募庶足
以資守禦但目下補官非尋常之比有一官必實得一

官之用方克有濟如臣標與三鎮所屬之官中有投誠者有年邁者有經畧調去將備及附叛如張忠等懸缺未補者擬與督臣會題既地阻難行欲候內部推補又恐耽延時日合無請

恩破格容臣與撫臣得以就近選擇膽力超羣技藝出衆者隨便委換如此則臂指可收而官無曠廢矣又計河西官兵四萬有奇入春以來並未給餉以披堅執銳之徒豈宜使有呼癸呼庚之事此臣不能不仰懇

皇上勅下司農在於山西近省撥發餉銀由榆林寧夏接濟燃眉如此則三軍用命可免枵腹之虞矣再賊氛日肆道路多艱羽書莫傳軍機窒塞雖有奇謀善畫不無面墻之嗟臣等欲從邊外

奏請機宜懇祈我

皇上賜勅蒙古貝勒若遇臣等差官往來不得阻撓併為引道如此則上下流通而征勦不難矣以上數款臣等確議俱係籌河西之要著固河西之至計蓋河西乃

關中之門戶河西既固然後驅兵四出圖克隴右殲滅
賊黨用抒我

皇上西顧之懷也統乞

俯念時勢危急速賜

勑部議覆臣等竭力圖維得以悉心辦賊而恢復之本
舉矣臣謹會同甘寧撫臣華善甘肅鎮臣孫思克西寧
鎮臣王進寶寧夏鎮臣陳福合詞具

題伏祈

皇上睿鑒勅部議覆施行康熙十四年二月二十日
題奉

旨議政王貝勒大臣會同速議具奏欽此查得當茲多事之際三邊調去官兵遺缺應聽該將軍張勇作速選補召募其伊所轄屬官員內年邁闇茸者亦聽該將軍張勇酌量更換至河西兵餉應

勅陝西總督巡撫即於協餉內作速撥解所稱欲從邊

外

奏請機宜甚為至當應差理藩院賢能官前往俄爾多思地方駐劄沿途設立驛站如遇齎奏人員給與驛馬引導前來仍應作速進勦平定之日從優議敘可也奉旨依議

提督甘肅等處地方總兵官太子太保左都督加一級臣張勇謹

題為密首偽諭偽劄偽印式事竊照臣於康熙十四年三月初二日統領官兵同甘寧撫臣華善按察使司臣

伊圖造桴渡河與西寧鎮臣王進寶圍困蘭州正在勦撫間於初八日有逆賊王輔臣差經畧原調甘州城守營守備陳旺來臣營中懷出逆賊吳三桂與臣偽綾諭偽綾劄偽綾印式各一方并逆賊王輔臣與臣逆書一封臣恨逆賊反叛負

國厚恩不自悔罪乃敢汚及于臣不禁髮指守備陳旺身受

國恩寧羌之變即使力微不能討賊亦當馳回原汎徐

圖後效乃竟附逆賊王輔臣且為之投送偽物裂屍寸磔尚不足以蔽其辜也理宜題報候

旨發落緣臣身在行間未便羈守除將偽綾諭偽綾劄偽綾印式三方并逆書一封及在守備陳旺身邊搜獲原領部劄一張并逆賊王輔臣所給照呈一紙呈送兵部外將守備陳旺會訊正法訖臣謹會同甘寧撫臣華善西寧鎮臣王進寶合詞具

題為此具本謹題報

聞康熙十四年三月初十日題奉

旨覽卿奏逆賊王輔臣差陳旺投送吳逆偽綾諭
偽劄偽印式及逆書卿即行舉首將逆差訊明正法
具見忠貞可嘉著議叙具奏兵部知道欽此議得
將軍張勇現係左都督太子太保一等阿達哈哈
番左都督之上無銜可加或應加給世職或晉加官
保伏候

上裁奉

旨靖逆將軍張勇勲舊大臣忠貞素著近因王輔臣背恩反叛殫抒偉畧悉心籌畫又舉首吳逆偽劄益勵忠純克盡臣節深為可嘉著封為靖逆侯

提督甘肅等處地方總兵官太子太保左都督加一級
臣張勇謹

題為殺敗蘭州逆賊恭報捷音事竊照蘭州逆賊計圖死守不時出兵衝突我營幸臣等平日設備業被我兵殺退屢矣臣隨會同西寧鎮臣王進寶按察使司臣伊

圖等密議將我兵分路夾擊俟賊衆出城時以砲聲為號併力齊進庶幾可獲全勝分布已定賊果於本年四月初二日城內吹號喊聲連天率大隊馬步千餘突出東門臣隨傳令放砲各路俱進令莊浪副將馬山鎮羌遊擊丁顯俊帶領兵馬堵截水關鎮臣王進寶統率標下官兵自關廂正東門迎首殺入提標中營叅將黃鉉等由關廂正南門斷尾殺入臣隨帶筆帖式卜延圖倪哈達圖海等俱各擐甲從中督率一齊奮力向前廝戰

自辰至午大敗賊兵直殺進東門甕城逆賊遂將城門
緊閉城上鎗砲矢石亂下如雨然後收兵統計當陣殺
死偽叅將一員併賊兵三百餘名活擒偽千把總四員
賊兵三十三名奪獲馬八十一匹盔甲旗幟器械大砲
鳥鎗無算所有擒獲賊兵應即正法姑留在營以作招
安之計除在事有功人員及輕重傷亡官兵俟查明另
報外臣謹會同西寧鎮臣王進寶合詞題

報伏乞

皇上勅部議覆施行康熙十四年四月初六日題奉

旨據奏鎮臣王進寶按察使伊圖等率領官兵殺進蘭州東門甕城擊敗賊衆陣斬偽叅將等得獲偽劄馬匹盔甲砲銃等項具見卿等調度有方官兵奮勇可嘉在事有功人員事平之日議敘具奏兵部知道

靖逆將軍兼管甘肅提督事務臣張勇謹

奏為恭謝

天恩事康熙十四年四月十三日准兵部密咨為請
隆事權以圖恢復事內開陝西提督張勇應授為將
軍仍管提督事務奉

旨張勇著授為靖逆將軍孫思克著加左都督王進
寶著加都督同知餘依議欽此密咨到臣又據臣差
官魏國華齋

奏回來報捧

皇上頒臣

勅印臣即率大小將領出郊迎接恭設香案望

闕叩頭謝

恩祇領訖伏念將軍專閫之權提督封疆所寄

朝廷責任綦重微臣駑鈍何堪迺荷

皇上破格拔擢既畀以事權復隆以爵秩人臣

受

恩高厚已極拜

命流涕報稱為難祇恐供職迂踈有幸

特簡至意然臣所屬地方正當用兵之際一鼓登城雖
乏出奇之策五申誓衆實堅用命之心務期盡掃妖氛
蕩平立奏以少酬

皇上寵遇於萬一也為此具本專差臣男張雲翼齎捧
奏

謝謹具奏

聞康熙十四年四月二十一日奏奉

旨覽卿奏謝知道了該部知道

靖逆將軍兼管甘肅提督事務臣張勇謹

題為恭報驅逐海彝殺敗逆賊恢復河洮二州事竊照臣等統兵圍困蘭州逆賊勢孤援絕稟懇招安以原係撫標城守官兵負罪深重各懷疑畏遂致不果仍揀命死守臣已知其窮逼不過暫偷釜息正計議攻圍間據河州土民郭亮等報稱海彝出口搶犯河州等情臣恐其窺伺臨洮不得不分兵前往相機勦禦因思洮州接連階文有土司楊朝樑者為土兵領袖臣隨給以叅將

銜劄檄令糾衆攻取洮州一以扼階逆之臂一以斷蘭
賊之後分遣已定議留西寧鎮臣王進寶全標官兵併
臣標官兵一半同按察使臣伊圖圍取蘭州臣於四月
初九日帶領臣標官兵一半自蘭起程至初十日到臨
洮府有海彝達爾加反成大肆搶掠攻克堡塞土狗歸
順者衆至數千臣隨差通官俞加興前去撫逐并發精
兵一千令副將馬山楊三元等率領前往河州相機堵
勦去後十四日據俞加興稟稱海彝聞我兵已至臨洮

盡將所掠人口牛羊并順去之土狥驅赴前行撤兵回
巢去訖并據副叅遊守馬山等報稱行至太子寺離河
州六七十里聞海彝俱已回巢職等率兵直抵河州城
下劄營當有知州鄒玗衛守備李秉龍等開城納欵回
稱逆賊偽副將曾文耀先聞大兵圍攻蘭州俱各驚駭
後因海彝搶犯附近地方復聞將軍提兵前來俱經逃
遁等情據此職等隨即統兵分路星馳追趕至土門關
漠泥關老鴉關奪歸猶民男婦一半隨交鄒玗李秉龍

令其安插得所并安撫軍民訖等由到臣該臣隨飭行各將備量留兵馬令河州副將楊三元防守餘皆撤回於十七日又據土司楊朝樑塘報奉令傳調各土司兵馬計有萬餘於四月初三日攻圍洮州并舊洮堡日夜攻擊賊勢孤危至十三日有偽總兵潘瑞冒死出城逃遁當即驅兵齊進殺死賊衆數百名活擒偽文武官宋兆先朱孔陽等奪獲器械馬匹併偽劄偽印無算除一面將蒙發安撫告示張掛曉諭外一面遣職子楊威等

率領精兵追趕潘瑞當殺死逆賊官兵數十名其餘墜崖落河者復數十人至十四日舊洮堡守備樊弘基亦率領紳士出降職亦如前安撫訖除傷亡土兵俟查明另報外所有活擒賊官并偽印偽劄器械馬匹等項遣職子楊威押解塘報到臣據此該臣看得王逆作亂偽總兵潘瑞偽副將曾文耀竊據洮河二州又海彝乘隙肆掠仰仗我

皇上天威一聞臣等兵臨曾文耀即先逃遁遣發土官

楊朝樑圍攻洮州而潘瑞旋亦棄城發兵撫逐海彝亦
復回巢而去且殺俘偽官賊兵獲有器械馬匹偽印偽
劄等項現將河洮二州一堡一時恢復除將偽劄印咨
送兵部外臣謹會同西寧鎮臣王進寶合詞題


報伏乞

皇上睿鑒施行康熙十四年四月二十一日題

奉

旨覽卿奏逆賊竊據河洮二州海彝乘隙肆掠卿親赴

臨洮遣發官兵進勦擊敗賊衆斬殺甚多生擒偽遊擊
宋兆先等得獲偽印劄器械等項恢復二州城池海彝
擊遁回巢具見調度有方將士奮勇可嘉在事有功人
員著議敘具奏該部知道



張襄壯奏疏卷二